



Aðildarfélag KSÍ  
b.t. formanna/framkvæmdastjóra

Reykjavík, 15. febrúar 2024

Reglugerð KSÍ um félagaskipti, samninga og stöðu leikmanna og félaga  
Tímabundin félagaskipti og dvalarleyfi á áhugamannadeildum

Ágætu félagar.

Á fundi stjórnar KSÍ þann 14. febrúar sl. voru samþykktar breytingar á reglugerð KSÍ um félagaskipti, samninga- og stöðu leikmanna og félaga. Um ræðir töluverðar breytingar á reglum um tímabundin félagaskipti sem tilkomnar eru vegna skylduákvæða sem aðildarsamböndum FIFA ber að innleiða í sínar reglugerðir.

Eftirfarandi er yfirlit yfir breytingar á texta í reglugerðum:

Það sem samþykkt hefur verið að falli inn í reglugerð er **rauðmerkt**.

Það sem samþykkt hefur verið að fella út úr reglugerð er ~~yfirstríkað~~.

## REGLUGERÐ KSÍ um félagaskipti, samninga og stöðu leikmanna og félaga

Eftirfarandi hugtök er notuð í reglugerðinni og ber að leggja neðangreindan skilning í þau:

**Brúarfélagaskipti:** Tvö samfelld félagaskipti (innanlands eða á milli landa) sama leikmanns með það að markmiði að skráning leikmanns að loknum fyrri félagaskiptum miði að því að samningsfélag leikmanns á loknum síðari félagaskiptum komist hjá greiðslu hvers kyns félagaskiptagjalds eða uppeldis- og/eða samstöðubóta skv. reglum FIFA til uppeldisfélaga.

**Heimaalinn leikmaður félags:** Leikmaður sem skráður hefur verið hjá einu og sama aðildarfélagi KSÍ á aldurstímabilinu 15 ára (eða frá upphafi þess keppnistímabils sem leikmaður verður 15 ára) til 21 árs (eða til loka þess keppnistímabils þegar leikmaður verður 21 árs), samfelld eða samtals í 36 mánuði.

14.7 Einungis umboðsmenn sem skráðir hafa verið hjá KSÍ eða öðru knattspyrnusambandi innan FIFA í samræmi við reglugerð KSÍ um umboðsmenn í knattspyrnu mega starfa sem umboðsmenn leikmanna eða félaga við samningsgerð og félagaskipti. Skulu slíkir umboðsmenn starfa skv. reglugerð KSÍ um umboðsmenn í knattspyrnu og skv. reglugerð þessari.

### 21. grein - Tímabundin félagaskipti/lán á samningsleikmanni

21.1 Félagi er heimilt að semja um tímabundin félagaskipti/lán á samningsleikmanni yfir tilgreint tímabil til ~~annars~~ nýs félags fyrir leikmann sem er á leikmannssamningi samkvæmt reglum KSÍ.

21.2 Beiðni um tímabundin félagaskipti innanlands fer í gegnum rafrænt félagaskiptakerfi KSÍ í samræmi við reglur Viðauka I við reglugerð þessa.

- 21.3. ~~Lágmarkstími tímabundinna félagaskipta er á milli tveggja félagaskiptatímabila. Leikmaður sem hefur fengið tímabundin félagaskipti með lokadagsetningu eftir lok síðara félagaskiptatímabils ár hvert fær útgefið keppnisleyfi með samningsfélagi sínu að nýju eftir lok keppnistímabils sama ár og tekur gildi við upphaf næsta félagaskiptatímabils. Hámarkstími tímabundinna félagaskipta skal vera til loka keppnistímabils sama ár og gengið er frá tímabundnum félagaskiptum.~~
- 21.4. Félög, sem semja um tímabundin félagaskipti **samningsleikmanns**, skulu gera um það skriflegan samning. **Eftirfarandi reglur skulu gilda um samningsgerð vegna tímabundinna félagaskipta: Þar sem fram koma kvaðir félaganna og hlutur leikmanns og skal hann undirritaður af báðum félögum, leikmanni og forráðamanni ef við á. Komi til vanefnda af hálfu félags sem fær til sín leikmann með tímabundnum félagaskiptum skal samningsfélag leikmanns ábyrgt fyrir efndum á leikmannssamningi hans. Brot á ákvæðum þessum skal fara með skv. kafla IX í reglugerð þessari.**
- 21.4.1 **Samningsfélag og nýtt félag skulu gera skriflegan samning („lánsamning“) þar sem tilgreina skal gildistíma samnings, réttindi og skyldur félaganna, sér í lagi fjárhagslegar skuldbindingar. Lánsamningur skal undirritaður af báðum félögum, leikmanni og forráðamanni þegar við á.**
- 21.4.2 **Samningsleikmaður og nýtt félag skulu gera skriflegan samning sem nær yfir tilgreint tímabil tímabundinna félagaskipta.**
- 21.4.3 **Á meðan tilgreint tímabil tímabundinna félagaskipta stendur yfir skulu allar samningskuldbindingar á milli leikmanns og samningsfélags falla niður, nema annað sé tekið fram í lánsamningi.**
- 21.4.4 **Lágmarkstími tímabundinna félagaskipta er á milli tveggja félagaskiptatímabila og skal hámarkstími tímabundinna félagaskipta vera til loka keppnistímabils sama ár og gengið er frá tímabundnum félagaskiptum. Samningsákvæði um lengri tíma tímabundinna félagaskipta hafa hvorki gildi né sjálfstæða þýðingu.**
- 21.4.5 **Framlengja má lánsamning svo fremi sem tímamörk greinar 21.4.4 tímabundinna félagaskipta séu virt og fyrir liggja samþykki samningsleikmanns.**
- 21.4.6 **Nýju félagi er óheimilt, án samþykkis samningsfélags, að lána samningsleikmann áfram eða samþykkja varanleg félagaskipti samningsleikmanns til þriðja félags.**
- 21.5. Ef samningi leikmanns við nýtt félag, sbr. grein 21.4.2, hefur verið rift einhliða fyrir lok tilgreinds tímabils tímabundinna félagaskipta, skal eftirfarandi gilda:
- 21.5.1 **Samningsleikmaður hefur rétt á að snúa aftur til samningsfélags.**
- 21.5.2 **Samningsleikmanni ber án tafar að upplýsa samningsfélag um einhliða riftun samnings og hvort leikmaðurinn muni snúa aftur til samningsfélags.**
- 21.5.3 **Ef samningsleikmaður ákveður að snúa aftur til samningsfélags, þá ber samningsfélagi að taka við leikmanni og skulu samningsskuldbindingar á milli leikmanns og samningsfélags aftur taka gildi frá þeim tímapunkti.**
- 21.5.4 **Ef samningi leikmanns við nýtt félag, sbr. grein 21.4.2., hefur verið rift einhliða án réttmætrar ástæðu af hálfu nýs félags og samningsleikmaður hefur ákveðið að snúa aftur til samningsfélags, þá á samningsfélag rétt á greiðslu bóta frá hinu nýja félagi. Bætur skulu að jafnaði samsvara hlunnindum og greiðslum til leikmanns samkvæmt gildandi samningi við samningsfélag frá þeim degi sem samningsleikmaður sneri aftur til samningsfélags og fram að lokum gildistíma lánsamnings.**
- 21.5.5 **Réttur samningsaðila, skv. grein 21.5, hefur ekki áhrif á réttindi samningsaðila sem kveðið er á um í 18. grein þegar við á.**
- 21.6. Eftirfarandi takmarkanir gilda vegna tímabundinna félagaskipta/lán á samningsleikmanni:

- 21.6.1 Hverju samningsfélagi er heimilt að lána til annarra félaga að hámarki sex samningsleikmenn hvert keppnistímabil.
- 21.6.2 Hverju félagi er heimilt að fá til sín á láni frá öðrum félögum að hámarki sex samningsleikmenn hvert keppnistímabil.
- 21.6.3 Takmarkanir í greinum 21.6.1. og 21.6.2. gilda ekki um lán á heimaöldum samningsleikmanni ef félagaskipti eiga sér stað á keppnistímabili þess almanaksárs sem leikmaður verður 21 árs eða fyrr.
- 21.7 Eftirfarandi takmarkanir gilda vegna tímabundinna félagaskipta/lán á samningsleikmanni óháð aldri samningsleikmanns:
- 21.7.1 Hverju samningsfélagi er heimilt að lána til annars félags (sama félags) að hámarki þrjú samningsleikmenn yfir hvert keppnistímabil.
- 21.7.2 Hverju samningsfélagi er heimilt að fá til sín á láni frá öðru félagi (sama félagi) að hámarki þrjú samningsleikmenn yfir hvert keppnistímabil.
- 21.7.3 Takmarkanir í greinum 21.7.1. og 21.7.2. gilda ekki um lán leikmanna á milli félaga sem tefla fram sameiginlegu keppnisið í 2. flokki karla og/eða kvenna.

#### 22. grein – Brúarfélagaskipti (*Bridge transfer*)

- 22.1 Félagi og leikmanni er óheimilt að taka þátt í brúarfélagaskiptum.
- 22.2 Gert er ráð fyrir, nema sýnt sé fram á hið gagnstæða, að ef tvö samfelld félagaskipti (innanlands eða á milli landa) sama leikmanns eiga sér stað innan 16 vikna tímabils, þá hafi viðkomandi félög og leikmaður tekið þátt í brúarfélagaskiptum.
- 22.3 Félag og/eða leikmaður sem tekur þátt í brúarfélagaskiptum skal sæta viðurlögum í samræmi við ákvörðun aga- og úrskurðarnefndar og/eða aganefnd FIFA (FIFA Disciplinary Committee).

#### 25. grein - *Almenn ákvæði*

- 25.7. Við félagaskipti erlends leikmans sem kemur frá öðrum löndum en innan EES, Grænlandi og Færeyjum í íslenskt félag skal beiðni um félagaskipti fylgja staðfesting frá Útlendingastofnun og/eða Vinnumálastofnun á dvalar- og atvinnuleyfi leikmannsins á Íslandi. **Við félagaskipti erlends áhugaleikmanns/sambandsleikmanns, til félags sem leikur í deild þar sem aðeins áhugaleikmenn leika, sem kemur frá öðrum löndum en innan EES, Grænlandi og Færeyjum í íslenskt félag skal beiðni um félagaskipti fylgja staðfesting frá Útlendingastofnun á dvalarleyfi leikmannsins hér á Íslandi.** Beiðnir um félagaskipti erlendra leikmanna utan þess svæðis en að ofan greinir eru ekki teknar til greina nema umrædd staðfesting liggja fyrir. ~~Í kjölfar þess óskar KSÍ eftir alþjóðlegu flutningsskírteini frá knattspyrnusambandi erlenda félagsins.~~

---

#### Greinargerð:

Um ræðir breytingar unnar af laga- og leikreglnanefnd KSÍ. Ný og breytt ákvæði um tímabundin félagaskipti/lán á leikmönnum byggja á skylduákvæðum (article 10) úr [reglugerð FIFA](#). Aðildarsamböndum FIFA, þ.á.m. KSÍ ber að innleiða í sínar innlendu reglugerðir ákvæði sem takmarka m.a. fjölda tímabundinna félagaskipta til og frá félagi. Reglurnar undanskilja þó frá takmörkunum lán á leikmönnum sem eru 21 árs eða yngri og eru heimaaldir hjá sínum félögum. Reglurnar takmarka m.a. fjölda leikmanna sem eitt félag má lána öðru tilteknu félagi, en þó er gerð undantekning á því ef um er að ræða lán á milli félaga sem tefla fram sameiginlegu liði í 2. aldursflokki (venslalið).

Það skal tekið fram að hvert og eitt knattspyrnusamband hefur ákveðið svigrúm hvað varðar takmörk á fjölda tímabundinna félagaskipta, svo lengi sem gætt sé að meginreglum sem finna megi í FIFA reglugerð. Sjá orðalag úr reglugerðinni:

*Associations are given three years from 1 July 2022 to implement, in agreement with domestic football stakeholders, rules on a domestic loan system which are in line with the principles of integrity of competitions, youth development, and the prevention of hoarding players. For the avoidance of doubt,*

the limitation on the number of loans at national level may differ from article 10 as long as it is consistent with these principles.

Undanþágu frá takmörkunum í FIFA reglugerð vegna tímabundinna félagaskipta í 21.7.3 (á milli venslaliða) er gerð svo takmarkanir rými saman við það umhverfi sem þekktist hér án þess að fyrirkomulag ógni heilindum knattspyrnumóta og knattspyrnulegu uppeldi og komi í veg fyrir ofsöfnun (hoarding) leikmanna.

Einnig er nú í reglugerðinni að finna ný ákvæði um það hvernig tekið skuli á einhliða riftun á samningi á meðan lánstímabili stendur og um heimild leikmanns til að snúa aftur til samningsfélags frá lánsfélagi. Tekið skal fram að við þær aðstæður að leikmaður ákveður að snúa aftur til samningsfélags í skilningi reglugerðarinnar, þá getur hann aðeins fengið leikheimild að nýju með sínu samningsfélagi þegar félagaskiptatímabil opnar að nýju og að því gefnu að aðra reglur um tímabundin félagaskipti séu virtar.

Þá er reglugerðinni nú að finna ákvæði um svokölluð „brúarfélagaskipti“ (*bridge transfer*). Brúarfélagaskipti er hugtak sem ekki hefur áður verið skilgreint í KSÍ reglugerð. Bann við brúarfélagaskiptum miðar að því að félög komist ekki hjá greiðslu hvers kyns þjálfunarbóta með því taka þátt í brúarfélagaskiptum.

Brúarfélagaskipti eru skilgreind sem tvö samfelld félagaskipti (innanlands eða á milli landa) sama leikmanns með það að markmiði að skráning leikmanns að loknum fyrri félagaskiptum miði að því að samningsfélag leikmanns á loknum síðari félagaskiptum komist hjá greiðslu hvers kyns félagaskiptagjalds eða uppeldis- og/eða samstöðubóta skv. reglum FIFA til uppeldisfélaga.

Loks hefur breyting verið gerð á reglugerð vegna félagaskipta erlends áhugaleikmanns/sambandsleikmanns, til félags sem leikur í deild þar sem aðeins áhugaleikmenn leika, sem kemur frá öðrum löndum en innan EES, Grænlandi og Færeyjum í íslenskt félag skal beiðni um félagaskipti aðeins fylgja staðfesting frá Útlendingastofnun á dvalarleyfi leikmannsins hér á Íslandi. Er þannig stigsmunur gerður á kröfum hvað varðar atvinnu- og dvalarleyfi í tilvikum félagaskipta til liða í deildum þar sem leikmannssamningar (professional) eru heimilir gagnvart félagaskiptum til liða í deildum þar sem einungis áhugaleikmenn (amateur) leika. Áfram yrði gerð sú krafa að fyrir liggi atvinnu- og dvalarleyfi vegna félagaskipta leikmanna frá löndum utan EES, Grænlands og Færeyja í lið í deildum þar sem leikmannssamningar eru heimilir.

---

Ef frekari upplýsinga er óskað þá vinsamlegast hafið samband við undirritaðan.

Haukur Hinriksson

Haukur Hinriksson,  
yfirlögfræðingur hjá KSÍ